

顓頊帝陵碑記

姜璧

史稱顓頊氏初國高陽而今治之東南舊壤有封邱在跡傳志之紀述故老之傳說以爲茲顓頊氏陵寢也則高陽爲初國諒矣第歲異而月不同時而祠時而隨圯時而祀時而隨隳甚則陵夷至今煙草蒼茫有不知爲誰氏之墟矣觀者能無感於斯乎適闕里孔賢侯來牧茲邑舉也弛修若廢飭若典章躡疆井者誦高陽氏之風已父老曰惟茲祀典可久闕不舉哉遂東指帝陵懇豎石爲修祀記侯曰夫祀以明禮禮以著誠誠且禮義舉也舉而義寧禁所爲具文申請當道俱曰可諸父老因鳩貲購石屬記言不佞不佞竊謂功不及民不祀祀不稽古不舉非功而祀則誣不稽而舉則誕誕且誣祀何裨禮不云乎有功於民則祀之黃帝正名百物以明民共財顓頊能修之斯舉也不惟功耶不稽古耶舉而惟功

則樹德不朽舉而稽古則崇祀不淫肆哉侯之俞衆議乎昭正祀
示民軌矣且此方民物奠安教義咸備尤爲帝之遺澤號稱八愷
若蒼舒隕散輩今日彪炳寰宇以倡起多士之才猷亦疇非帝德
以苞而孕也夫八士祀於鄉而況功於帝乎侯之俞衆議良肆哉
雖然海不辭東流者大之至也聖人並包蓋輿陶鑄疇類而忘其
誰氏奚以俎豆爲聖人以天地爲大鑪造化爲大冶又豈區區於
一坏之土而與木石校存亡意斯舉也蓋亦有隆古之思乎聞禮
云有虞氏祖顓頊而宗堯孔子系出有虞氏是唐虞之理所濬發
者遠孔子之祖述固先程也況夫承孔子之後撫高陽氏之遺民
者宜若之何斯舉也豈獨昭正祀示民軌將使觀世風者砥其石
隆其治也士民仰體德意峙厥祠修厥祀殫厥誠以無廢厥禮則
務義敦典奚幽不格行且見治化之翔洽人文之蔚起與此石不

朽矣於是乎記

隋郡功曹馮原墓誌

君諱原字士陸河間高陽人也家傳積德世業克隆惟祖惟父宦成名立其開國成家之始發原受命之由世踵英賢已詳史策君體局閑雅志業深遠清風素範獨步當時據德依仁見推州里天姿孝友已總萃於心神自然誠信亦兼備於襟抱年甫弱冠郡辟司功俯協時望非其好也尋即謝病桑梓不事王侯樂道怡神脩然物外雖彼翹翹車乘視之若埃塵芟芟束帛遺之如草芥鐘鼓不能動其慮軒冕未足撓其情賁有道於邱園方期之於遠大胡其不壽今古同悲寧謂天地無心神祇不惠以隋仁壽四年二月二十三日遘疾云亡時年五十以大業六年十一月二十一日葬於縣城南四里子意政勤茂等悲陟岵之無見歎負米之無爲想

罔極之深恩控蒼旻之莫報淚流所染則墓栢焦枯啼聲所聞則
庭禽迸迹寒來暑往地久天長盛範徽猷湮滅終古爰勒茲銘寄
之來世

元孝子百戶劉智墓題詞

劉士美

夫人子事親於平安之際服勞奉養未足爲敬愛憂親疾危忘之
時捨生殺身尤人情之所不易果能以此竭其力盡其誠而造乎
遠大之域則可以感天地動鬼神而致其子孫高貴家門昌大者
必矣陞陽劉公百戶家門大口衆子孫材且賢享八十有四歲指
以天年終於正寢公諱智明之其字也賦性剛毅爲人灑落知行
孝道得事親禮愉悅柔和之誠旨甘滌瀦之奉未嘗有所偏廢一
日親遘疾公憂懼迫切之情無所不至或旁求醫藥或暗禱神明
願以身代後乃自言聞人有割肝愈疾者信乎否我其試之竊入

私室操刀剖腹割肝自作羹以供親親食後病即瘥已亦無恙若
匪仁孝至愛親重憂疾切而肯爲是其感應致祥餘慶之兆當如
何也生三子長曰政次曰成季曰尹公不使三子廢學次子不求
聞達長與秀皆通籍共登仕板各居流品赴任俱以清謹見稱噫
以是觀之信知劉公仁孝之至陰功之厚所致一日會集其二弟
與子姪於前而諭曰凡人之享富貴子孫盛大皆因祖先所積我
等不才居天職食天祿若非祖父仁孝致奚克然余欲樹一石於
祖塋側刊其行實庶彰報本追遠之意廣揚行善重戒子孫於無
窮何如衆然其言政隨伐石南山磨壘功畢載酒肴訪余於田舍
數四具狀請予文之詳其狀因感其父子孝且賢故不辭寡陋聊
應命以銘之其辭曰孝子良行異常親有疾割肝芒與親食壽而
康誠所致子孫昌樹之石千載揚

元孝子百戶劉智墓記

孫承宗

劉孝子者勝國百夫長曾剖肝瘳親事在劉進士士美題詞蓋由泰定來三百餘年兵火幾遭而此石巋然無壞亦孝秉天彝卽藎夫悍卒有不忍墮者孝子里去城三里許去予塋可半里予每拉友人步其下卽枯株野鳥啁嘲上下嘗低徊久之不能去其地佩兩水面孤峰亢爽回環故其人遂得與舒豷同名天壤則人地靈傑豈偶也孝子之裔孫諸生燦然爲予門人予偶謂生云爲侯王之裔不若爲忠孝之裔世有裔侯王而不敢自列其先廼忠孝類侈言之予邑許睢陽忠烈苗裔滿天下而所在列其塚祠一時熏轅豪華如某如其子孫聞語及者無不覲然汗下而不能語然則忠孝之裔勝公胄也予旣表許忠烈祠廼更低徊孝子適燦然除先墓而薙蕪立仆補其缺甌遂題其語於石嗟乎臣忠子孝字

宙大倫劉戶侯韎韜君子而躬摯行以彼引芒一念乘障當敵尙可爲睢陽乎誰謂不經不訓也敢藉以勵糜糜者

山西布政使司叅議李儼墓表

楊廷和

公諱儼字仲威姓李氏其先世爲高陽人曾大父諱德明大父諱進皆有隱操父諱甫榮質直好古卒時年八十三以公貴贈奉直大夫南京戶部員外郎母顏氏復聖公之後贈宜人繼梁封太宜人公以成化七年舉於鄉十四年第進士授南京戶部主事歷員外郎郎中至山西布政司右叅議少力學攻苦爲諸生時常寓宿學舍隆冬至以雪盥面及居官長於吏理所至盡心職守每建一事輒思爲久遠計在山西主邊餉先是姦豪多所乾沒重困貧民公盡法繩之不少假借顧爲當路者所柅遂致其事歸曰在我者固無愧也公孝友性成待族人恩義或有強割公分地以自益

者不與較曰使我有如范文正公置義田彼寧至是耶寡姊年老而貧其子女婚嫁皆公爲之經理親表中有孤煢者多收恤之同官張郎中倫與其配俱卒於官遺一女甫及笄公親爲殯殮移其女偕已女處保愛周悉待其家人至資之以歸里馬氏孤隨其母嫁郭氏郭欲盡有馬之產喉隣郡有軍籍者誣訴之代役訟繫歲餘公爲白其事於所司乃得釋嘗假南京富人金爲道里費歸休後特令其子走數千里往償之性耿介取與有分辨雖茗果之微於寮窠間亦不輕受或謂公不能容人之私而有容人之量人能屈其所可爲而不能屈所不可爲聞者以爲知言配郭氏同邑世家女父諱寧母張氏年十七歸于公梁宜人性嚴甚宜人事之盡禮初隨公居邑中躬紡績以供薪米及楮墨之費時舅氏與梁留鄉舍旬日必具酒肉問慰邑舍有杏若梨數株每結實朝暮守

視必先親摘以奉舅姑乃敢嘗其孝誠類如此凡公有義舉多宜人贊成之子男二人長師孔七品散官次師儒舉進士累官鳳陽知府方進未已女五人長適韓鴻次適衛輝府同知張經次適都察院右副都御史劉愷次適尙寶司丞劉臯次適指揮袁繼勳孫男六東生邑庠弟子東作東升東少皆治舉子業東喬東涵尙幼孫女十人已嫁者六其婿郭廷賀張漑馮芝房大有馮鰲丁箎皆名家子亦各治舉子業餘未字公生正統三年正月二十九日其卒弘治十六年十一月二十七日得年六十有六以卒之又明年塋所居龐口村之東北二里宜人生於正統二年卒於正德八年八月二十日年七十有七與公合塋初公塋時未有銘後師儒請予表其墓尙未有以應也至是宜人卒乃併以請予與公爲同年進士師儒又予考會試所取士有世好也故爲之表復系以銘曰

君之行已斤斤自持非以爲異不涉于隨施於有政不必於慈謂果與達從政之宜不究其用其澤則遺彼美宜人德則匹之人亦有言刑家之儀終焉同藏子孫之思考履於素不愧刻辭

明累贈光祿大夫左桂國少師兼太子太師吏部尙書中極殿大學士振野李公暨配累封一品太夫人鄭氏合葬墓

誌銘

孫承宗

予邑文行世家則有郡城之劉龐口之李兩族罔不祖孫父子甲第蟬聯而劉得其四李得其三李饒孝廉二其在者發元仍當千佛上第兩族多文而又罔不簡束至行其幅巾方袍安爾蓬繩絕不効大家兄弟而質有其文迺丁甲繁多則李尤最予與兩族多嫺親在諸生則與孝廉發元之祖龍塘中翰國棠之父肖野洎少師元治之太翁振野爲友而中翰霽之父玄溪同入序玄溪之子

孝廉震同予兒籍而侄鎖婚嫻兄弟也迺少師實師予蓋太翁歿三十年而太夫人歿時少師歿已逾年當少師歿而堂於臺室於嫠藐孤於庭衆爲心惻無何太夫人歿益爲心惻然太翁撫古爲叫寶樹千霄太夫人黃扉退食佩規聖善赤舄承懽作頌闕宮蓋予讀世綸而雲錦天章昭垂日月迺知少師所嚙嚙未慊凡以太翁之養不比夫人而太夫人之喪不比於翁然而承治學弓和丸調鼎其功大而太翁木拱門高麗景長楸太夫人大年異數列茵日下斯亦日畿之特瑞皇際之殊榮已太翁孝友惠和哀殊慧辨當靡瞻載歎而孤峙鵠原合群雁序仲產不問确肥嫡幃調於溫清蓋身晦道光家貧行義故平亭糾紛立應取攜其嘯枯比于春鳴祭酒高爲月旦而藜光未耀座客不空眠柳植槐有汎蟠天蜚者矣太夫人嚴姑谿於毛裏則太翁之奉嫡也介似釋於耦猜則

太翁之友昆也迺若解佩食賓佐翁爲德暇以含飴貴猶効績則貧而能禮豐而能約故察及米鹽御以澣濯遂以承九命之攸飽大官之賜無亦手口之澤行開霖雨歿存之誼式於鼎彝乎太翁生嘉靖辛亥四月十一日卒萬曆乙巳八月二十一日壽五十五歲太夫人生嘉靖丁未二月二十一日卒崇禎辛未十二月二十二日壽八十五歲按狀太翁諱知先振野其號也爲邑諸生以少師貴累贈光祿大夫左柱國少師兼太子太師吏部尙書中極殿大學士其始祖平福居邑之龐口村生德明德明生進進生甫榮贈奉直大夫南京戶部員外郎甫榮生儼成化戊戌進士歷官山西叅議生二子長師孔七品散官今贈柱國少師兼太子太師吏部尙書中極殿太學士次師儒弘治庚戌進士歷官叅政師孔生東少臨洮府經歷累贈左柱國少師兼太子太師吏部尙書中極

殿大學士是爲太翁父配胡氏累贈一品夫人臨洮公有子六太翁其六也生母爲吳氏累贈一品夫人太翁配鄭氏累封一品太夫人爲任邱儒官淳女祖爲平涼太守珩其母王氏鄭實生少師諱國槽太翁不售於璞而以迪少師司衡以少師茂才異等當太翁艱而予之餼而太翁不見也然相業迪於太翁少師初娶陳氏爲邑人陳煥女繼娶趙氏爲永平訓導任邱趙應夢女俱早卒俱累贈一品夫人繼娶張氏累封一品夫人爲順天庠生張經綸女一適任邱庠生胡守憲爲蘇州府通判思恭男孫男一爲廕尙寶司司承霽趙出孫女二長適邑庠生馮倬爲貢生嘉祥男陳出次尙幼張出兩中翰國棠霽謂霽以崇禎五年三月二十四日奉太夫人柩合葬於太翁之壙而乞言廼爲銘銘曰六龍翩翩匪鯨匪緒悶其爲潛或振于野子龍天蜚雨于方夏高城之東高河之

下雄雌合宮永食有嘏

明光祿大夫左柱國少師兼太子太師吏兵兩部尙書中極

殿大學士贈太傅諡文正孫公墓表

魏裔介

先生諱承宗字稚繩別號愷陽生於嘉靖四十三年正月壬申六歲入塾出語驚人十六歲補博士弟子十七歲試首卷食餼三十歲入塾出語驚人十六歲補博士弟子十七歲試首卷食餼三十一歲選入國雍甲午中鄉試第五會試落第仗劍遊薊門榆關周歷塞下停障具知險塞阨要處詢營弁老革之習於兵事者按行戚將軍所設施防守事宜慨然有志己亥讀書雲中撫署值兵躁公教吏書榜頃刻定之自甲午至甲辰十年讀書以一甲第二名及第除授翰林院編修又十年甲寅陞左春坊左中允庚申陞左春坊左庶子充日講官添設兵部侍郎以公爲之壬戌以公爲兵部尙書兼東閣大學士又以在晉懦自請督師辟鹿善繼爲叅佐

至關門旌旗壁壘爲之變色立六館以招天下豪傑簡汰老弱訓練精兵烽火方息朝議遂起謂公用撫鎮爲不得人公求去不允崔呈秀首疏劾科臣郭興治和之公遂告歸公當官四載其籌畫訓練節省諸經濟俱在本傳中乙巳命公移鎮關門復遵化永平灤州遷安加公太傅廕一子錦一世襲而中朝科道議者不已公上疏乞休不許仍令視事公十七疏求罷得閑住戊寅高陽失守公被執主兵者勸之降不屈縊死之冬十一月十日也距其生得年七十有六公配王贈一品夫人生子七銓鈐鈐鎔鎔鎬諸孫之蒞官至錦衣衛指揮僉事見存之藻等十餘人俱青衿餘載墓誌家傳中不具述所著文集共二百餘卷

明光祿大夫左柱國少師兼太子太師吏部尙書中極殿大學士贈太保諡文敏李公暨元配封孺人累贈一品夫人

高麗書卷一
陳氏繼配封安人累贈一品夫人趙氏合葬墓誌銘

孫承宗

予觀古大臣以出處與天下興替相對故有剝以貫魚不嫌爲碩亦有乾以飛龍不嫌爲潛要以內觀身外觀天下當其隙開媼相憂生孽卿緝思編苦儼退以進儼去以留迂其身衛社稷以待聖明及天剗荒荼聖啓彝庚方且問冥鴻于碩藹楊滯羽於瘁林而當進廼退當留廼去舉天下以仰奉一人而謝大任於風虎雲龍之佐蓋駢陰抗趾決不可無一君子以續離縷衆正連茹正可容一君子白其嚮日雅懷以光盛世予蓋有慨於予邑文敏李公云公當今皇帝以熹皇帝遺命遵高皇帝弟及之命登寶位也蓋天人歸與中外頌懽自非臣下可贊一辭獨是黨臣交口美新賴正人防徵杜漸頓令低徊而未敢恣則公之功在不見不聞及熹皇